

Bleras spezias d'amfibis èn periclitadas

La confederaziun ha surlavurà ses inventaris

■ (anr/hh) **Cun excepziun da la rauna da prada èn tut las spezias d'amfibis en Svizra periclitadas. Per quest motiv ha il cussegl federal recepì 37 objects novs en l'inventari federal dals territoris da frega d'amfibis da muntada naziunala. Plinavant ha el acceptà la revisiun parziala da l'inventari federal da palids e da regiuns umidas. Las midadas van en vigor l'entschatta fanadur 2007.** Che bleras spezias d'amfibis (raunas, rustgs, salamanders e piutschas) èn periclitadas ha in motiv principal: Lur spazi da viver e lur lieus da frega vegnan sminuids successivamain e destruids. Dapi che l'ordinaziun areguard la protecziun dals territoris da frega dals amfibis è ida en vigor l'onn 2001 han ils territoris da reproducziun ils pli impurtants pudì vegnir mess sut protecziun en collavuraziun cun ils chantuns. Damai ch'intgins da quels habitats sa chattan en chavas da glera che vegnan nizzegiadas, cuntegn

l'inventari federal er ina glista speziala per objects migrants. Tras quai po vegnir tegnì quint dal spustament da las auas indispensablas per la reproducziun. Sco quai che l'Uffizi federal per ambient scriva, sa chattan ils objects novs da l'inventari en ils chantuns Turgitg, Berna, Sursilvania, Argovia, Turgovia, Tessin, Vad, Genevra e Giura. La gronda part dals territoris è gia protegida. Inclusiv ils 37 lieus novs cuntegn l'inventari oz 824 objects. Ils singuls lieus han surfatschas tranter in tozzel meters quadrat enfin in kilometer quadrat. Per radund 70 objects èn las decisius definitivas anc da prender. Quels territoris èn sut protecziun transitoria.

Naginas midadas en il Grischun

Sco quai ch'il manader da la partiziun natira e cuntrada da l'Uffizi per natira ed ambient dal chantun Grischun, *Andreas Cabalzar*, ha ditg sin dumonda da l'Agentura da novitads rumantscha, ha i dà en



quest connex naginas midadas en il Grischun. Tut en tut dumbra quel anc adina 38 objects. Promovids vegnan quels en emprima lingia en il fons da las vals, là nua ch'il spazi vital dals amfibis è periclità. En questa direcziun è er vegnì instradà il concept da rait da la Val dal Rain grischuna ed emprimas stentas da salvar

objects periclitads vegnan er fatgas en il Partenz. En las vals dal sid che disponan er da tals objects èn mesiras da promozion da lieus da frega dals amfibis anc betg instradadas.

Adattà ils inventaris

Il medem mument ha il cussegl federal

Il spazi da viver dals amfibis sa reducescha vinavant. Cun mesiras da protecziun vul la confederaziun prevegnir ad anc pli gronds donn.

KEYSTONE

approvò quatter ulteriurs inventaris federals ch'èn suttamess a la lescha areguard la protecziun da la natira e da la patria. En l'inventari da las palids planivas ha el recepì otg objects novs en ils chantuns Friburg, Giura, Neuchâtel e Tessin. 13 ulteriurs objects èn vegnids adattads en las cartografias chantunales. Da l'inventari da palids autas e palids transiziunales è in object dal chantun Vallais vegnì stritgà e tar l'inventari da las cuntradas da palì èn plirs objects vegnids adattads. Quest atun vegn l'Uffizi federal per ambient a publitgar ina bilantscha areguard la protecziun da las palids e las cuntradas da palì. Singulas midadas èn er succedidas tar l'inventari da las regiuns umidas. Terminada è plinavant l'elavuraziun dal nov inventari federal davart las pradas sitgas da muntada naziunala. La procedura da consulta-ziun davart quest inventari è instradada e po vegnir terminada en curt.